

PERANAN GOLONGAN MUDA DALAM PERUBAHAN AGAMA MASYARAKAT MURUT TAHOL, DI SABAH

ABD HAKIM MOHAD, AHMAD TARMIZI TALIB & FATAHYAH YAHYA

ABSTRAK

Golongan muda merupakan golongan yang paling dinamik dalam sesebuah masyarakat. Kekuatan fizikal dan mental yang mereka miliki serta keinginan yang tinggi terhadap sesuatu perkara menjadikan golongan ini sentiasa aktif meneroka apa juga kemungkinan dalam kehidupan. Oleh sebab itu, golongan muda lazimnya memainkan peranan penting dalam memacu perubahan dalam masyarakatnya. Masyarakat Murut Tahol misalannya telah meninggalkan kepercayaan tradisional, dan menganut agama Kristian hasil daripada dinamika golongan mudanya. Makalah ini akan membincangkan tentang perubahan agama masyarakat peribumi Sabah ini serta peranan yang dimainkan oleh golongan mudanya. Hal ini menarik untuk ditonjolkan memandangkan isu agama dan kepercayaan biasanya dikuasai oleh golongan tua; tetapi golongan muda masyarakat ini berjaya membuktikan sebaliknya. Apakah yang telah mereka lakukan bagi meyakinkan masyarakatnya untuk meninggalkan kepercayaan tradisi nenek moyang yang telah dianuti sejak turun temurun, dan menganut satu agama baharu. Maklumat dan perbincangan dalam makalah ini adalah hasil kajian yang dilakukan di Ulu Tomani, Sabah. Selain daripada korpus perpustakaan dan temu bual informan penting, kajian ini juga menggunakan kaedah pemerhatian ikut serta untuk mendalami masyarakat yang dikaji.

Kata Kunci: Murut Tohol, Kepercayaan Tradisional, Agama Kristian, Peribumi Sabah

ABSTRACT

Young generation are among the most dynamic in the society. Their physical and mental strength with high desire on something new around them make these people actively explore every possibility in life. Therefore, young generation often play an important role in leading change within the community. Murut Tahol society for example has left traditional beliefs, and embrace Christianity as a result of the dynamics of young generation. This paper will discuss the changes in the indigenous religion of Murut Tahol of Sabah and the role played by young people. It is exciting to be featured as the issue of religion and belief is usually dominated by the elderly; but young generation of Murut Tahol are able to prove otherwise. What have they done to convince the community to abandon the old tradition of ancestor belief that have been practiced since generations, and embraced a new religion? Information

and discussion in this paper is the result of a study conducted in Ulu Tomani, Sabah. In addition to the corpus of the library and interview key informants, this study uses observation as well to deepen community studied.

Keywords: Murut Tohol, Traditional Belief, Christianity, Sabah Natives

PENDAHULUAN

Agama atau sistem kepercayaan merupakan perkara yang amat penting dalam kehidupan manusia. Ia membentuk cara manusia berfikir dan bertindak. Perubahan pada aspek ini tentunya meninggalkan kesan yang besar dalam diri seseorang. Oleh sebab itu, bukan mudah seseorang individu atau masyarakat membuat keputusan untuk mengubah agama dan kepercayaan mereka. Tambahan pula agama yang dianuti adalah agama nenek moyang yang diwarisi sekian lama.

Komuniti Murut Tahol Di Sabah

Di Sabah, Murut Tahol adalah kelompok terbesar daripada 12 pecahan masyarakat Murut yang terdiri Murut Gana, Murut Keningau (Nabai), Murut Timugon, Murut Beaufort, Murut Bookan (Tangara), Murut Paluan, Murut Sumambu/ Tagal, Murut Kolod (Okolod), Murut Selungai, Murut Sembakung, Murut Kalabakan dan Murut Serudung (Spitzack, 1984:187-189). Selain Murut, masyarakat Sabah yang lain terdiri daripada masyarakat Kadazan-dusun, Bajau, Iranun, Suluk, Bisaya, Kedayan, Tidong, Sungai, Melayu Brunei dan masyarakat bumiputra yang lain. Berbanding dengan keseluruhan penduduk Sabah, masyarakat Murut Tahol mewakili 0.03% sahaja, iaitu dianggarkan berjumlah 48,000 orang. Angka ini mewakili separuh dari jumlah keseluruhan masyarakat Murut (Buletin Perangkaan Bulanan Sabah, 2010:12).

Masyarakat Murut Tahol mendiami kawasan tanah tinggi pedalaman Selatan Sabah yang meliputi kawasan Tomani, Rundum, Pensiangan, Tenom dan berkembang hingga ke Sapulut dan Pensiangan. Murut Keningau yang dipanggil Murut Nabai menduduki kawasan tanah rata Keningau, dan Murut Timugon menduduki kawasan tanah rata Tenom. Murut Bookan tinggal di kawasan lembah Sungai Dalit di sempadan Sook. Murut Kolod tinggal di kawasan Bole, Sipitang dan bahagian Utara Kalimantan. Murut Tengara (Kinabatangan) mendiami kawasan Ulu Sungai Kinabatangan berkembang ke bahagian barat melintasi Ulu Sungai Kuamut (Rutter, 1929:65-66).

Sebagaimana yang diungkapkan oleh Tregonning (1965), masyarakat Murut menjalani kehidupan yang ringkas. Mereka tinggal di rumah panjang dan mengamalkan adat dan budaya tradisional yang diwarisi turun temurun dari nenek moyang mereka. Perkampungan mereka terpencil dan jauh di pedalaman, sesuai dengan cara hidup mereka yang menjalankan aktiviti ekonomi dengan berhuma dan memburu.

Asalnya masyarakat Murut Tahol berpegang kepada kepercayaan animisme. Seluruh kehidupan mereka dari awal kelahiran sehingga meninggal dunia mempunyai kaitan langsung dengan kepercayaan tersebut. Dunia ghaib sentiasa sahaja memerhatikan kelakuan mereka dan memaksa mereka melakukan perkara yang dapat menggembirakannya. Sekiranya ingkar, maka mereka akan menerima hukuman dalam bentuk bencana dan malapetaka seperti kemarau panjang, banjir, kematian dan sebagainya. Sekiranya kesalahan itu kecil, maka sesuatu bencana itu akan menimpa individu yang berkenaan sahaja, tetapi sekiranya kesalahan itu besar maka ahli keluarga dan masyarakat kampung keseluruhannya turut menerima akibatnya. Oleh yang demikian, masyarakat Murut Tahol tidak mempunyai pilihan melainkan terus mematuhi adat dan tradisi yang mereka warisi dari nenek moyang mereka demi keselamatan masyarakatnya. Menurut Antikuh Lituan, "...kami dulu hidup ikut adat, tidak boleh langgar, kalau tidak nanti hidup kami susah. Kena kemaraulah, banjir, kematian...".

Agama Kristian Kalangan Komuniti Murut Tahol

Sebenarnya, usaha untuk memperkenalkan agama Kristian kepada masyarakat Murut Tahol telah mula dijalankan pada tahun 1930 oleh mubaligh dari Indonesia. Namun, usaha tersebut gagal dan kemudiannya mereka keluar dari kawasan Murut Tahol kerana faktor keselamatan memandangkan respons yang diterima adalah di luar jangkaan dan agak membahayakan. Pada tahun 1937, mubaligh dari BEM pula telah datang kepada mereka atas maksud yang sama. Usaha mereka juga gagal (Lees, 2006:104).

Selepas itu tidak ada lagi mubaligh yang dihantar ke kawasan Murut Tahol. Sebaliknya mereka lebih menumpukan urusan dakwah kepada masyarakat Lun Bawang yang menerima baik kehadiran mereka. Namun demikian suatu yang di luar jangkaan telah berlaku apabila pada tahun 1950, seramai 50 orang Murut Tahol dari Maligan telah datang ke tamu besar di Sipitang dan berjumpa dengan Alan Belcher serta memintanya mengajarkan mereka tentang Alkitab. Mereka mendesak agar seorang mubaligh dihantarkan kepada mereka dengan segera. Keterbukaan mereka untuk menerima Kristian bermula apabila mereka melihat perubahan positif yang berlaku kepada masyarakat Kristian Lun Bawang yang tinggal berdekatan. Namun demikian, oleh kerana semua mubaligh sudah mempunyai tugas dan komitmen masing-masing, maka Alan Belcher mencadangkan kepada mereka untuk menghantar sepasang suami isteri ke Sekolah Pengajian Alkitab (Lees, 2006:104).

Hasil daripada perbincangan tersebut, dua orang pemuda iaitu Impau dan Lutus bersama isteri masing-masing telah dipilih untuk mempelajari agama Kristian di Pusat Pengajian Alkitab di Lawas. Semasa cuti pengajian, mereka telah menghimpunkan penduduk di Maligan dan berkongsi ilmu dengan mereka. Kemudian, pada 1951, Alan Belcher telah berkesempatan melawat Maligan. Sepanjang beberapa hari berada di sana, beliau bersama-sama Impau dan Lutus telah mengadakan beberapa pertemuan dengan penduduk kampung (Lees, 2006:105). Seterusnya pada 1952,

sebuah gereja telah dibina di Maligan (Harris, 1995:10-11). Impau dan Lutus telah berjaya meyakinkan masyarakatnya tentang kebenaran agama Kristian yang dibawa. Walaupun masih muda, tetapi mereka diterima baik masyarakatnya.

Setelah menganut Kristian, masyarakat Murut Tahol di Maligan telah mengalami beberapa perubahan yang positif. Mereka tidak lagi dikaйтkan dengan berbagai penyakit yang disebabkan oleh persekitaran yang tidak bersih. Sebaliknya, mereka telah dikenali sebagai masyarakat yang sihat dan lebih terkehadapan dalam kehidupan sehari-hari. Ini kerana pihak gereja juga menjalankan program pendidikan di tempat mereka.

Kehidupan masyarakat Murut Tahol Meligan yang dilihat lebih baik telah menarik minat masyarakat Ulu Tomani untuk mengenali agama Kristian. Pihak gereja telah melantik seorang pemuda bernama Amat untuk menjadi mubaligh di Ulu Tomani (Lees, 2006:106-107).

Amat menerima tugas ini dengan penuh rela hati bagi menyempurnakan amanah sebagai mubaligh. Masyarakat Murut Tahol menyambut baik kehadiran Amat. Mereka menunjukkan kesungguhan untuk mengetahui lebih lanjut tentang agama Kristian. Tanpa dipaksa mereka berjalan kaki daripada perkampungan mereka ke rumah Amat untuk mendengar perkhabaran gembira pada setiap hujung minggu. Ada antara mereka yang mengambil masa berjam-jam lamanya untuk sampai. Bagi mereka, pengorbanan yang dilakukan ini berbaloi dengan pengisian rohani yang mereka peroleh. Sebagaimana yang berlaku kepada masyarakat Lun Bawang, hal yang sama juga berlaku kepada masyarakat Murut Tahol, di mana agama Kristian berkembang dengan pesat dari satu kampung ke satu kampung merentasi hutan belantara yang sebelum ini hampir tidak disentuh (Lees, 1964:56-57).

Pada 1954, Amat dan beberapa orang lain dari Tomani telah memulakan usaha untuk menulis nyanyian gereja dalam bahasa Murut Tahol bagi memenuhi keperluan masyarakat di sana. Hal ini merupakan suatu yang baru, kerana sebelum ini belum ada lagi usaha seumpamanya dilakukan. Komitmen yang diberikan oleh Amat telah berjaya melahirkan satu lagi masyarakat Kristian yang mempunyai komitmen yang tinggi. Mereka menunjukkan perubahan yang menggalakkan. Mereka tidak lagi dibelenggu oleh kinaruroa (semangat) kerana keputuhan mereka telah bertukar kepada Jesus Kristus. Begitu juga dengan amalan minum tapai yang sebelum ini menjadikan mereka mabuk sehingga tidak dapat bekerja telah beransur-ansur ditinggalkan (Lees, 1964:60). Selain daripada mubaligh Amat dan isterinya, terdapat juga mubaligh lain yang turut membantu menyampaikan ajaran Kristian dalam kalangan masyarakat Murut Tahol seperti Dr Bill Lees, dan isterinya Shirley Lees, seorang pemegang ijazah sarjana dalam bidang antropologi yang telah menghabiskan masa selama 14 tahun bersama masyarakat Tahol untuk mengembangkan agama Kristian sejak tahun 1956.

Para mubaligh yang datang tidak hanya menumpukan perhatian dalam hal-hal berkaitan agama dan kepercayaan semata-mata. Sebaliknya, mereka turut terlibat dalam aktiviti sosial dengan membantu pihak pentadbiran British meningkatkan kesedaran tentang aspek kesihatan dalam kalangan masyarakat Murut Tahol. Hal ini penting untuk menangani masalah penularan penyakit seperti wabak malaria, cacar, demam dan selesema. Bagi mubaligh yang mempunyai latar belakang perubatan, mereka telah terlibat secara langsung bersama pihak British dalam mewujudkan klinik-klinik di kawasan pedalaman. Peluang ini diambil oleh mubaligh-mubaligh Kristian untuk mengembangkan agama Kristian di samping membantu masyarakat Murut Tahol daripada aspek kesihatan, sebagaimana yang diungkapkan oleh Lees:

“A Christian community had opened the way to the possibility of a dietetic revolution which had led to a health revolution” (Lees dan Lees, 1987:79)

Perkembangan pesat agama Kristian kalangan masyarakat Murut Tahol dapat juga dilihat daripada jumlah gereja yang telah didirikan. Sehingga tahun 1993 terdapat 44 buah gereja Sidang Injil Borneo (SIB) di perkampungan masyarakat Murut Tahol di sepanjang sungai utama dan 30% hingga 40% daripada mereka adalah ahli gereja SIB (Harris, 1995:10-11).

PERBINCANGAN DAPATAN KAJIAN

Perubahan agama yang berlaku kalangan Murut Tahol telah mencetuskan beberapa persoalan besar, antaranya ialah tentang pandangan mereka terhadap kepercayaan asli mereka dan agama yang baharu. Persoalan selanjutnya adalah tentang pandangan mereka terhadap golongan muda seperti Impau dan Lutus di Maligan; dan Amat di Ulu Tomani yang telah membawa agama Kristian kepada masyarakatnya. Mengapa golongan yang lebih tua dan berpengaruh iaitu lomahon dan amabas (pakar perubatan tradisional) seolah-olah membiarkan sahaja masyarakatnya ditarik daripada kepercayaan tradisional mereka?

Perubahan agama bukanlah satu perkara yang tidak boleh dianggap kecil atau ringan sama ada bagi individu yang terlibat atau masyarakat sekitarnya. Hal ini kerana perubahan agama bukan sahaja melibatkan perubahan dalam sistem kepercayaan individu malah turut memberi kesan kepada amalan hidup sehari-hari dan persepsi mereka terhadap kehidupan. Sifat perubahan itu pula sangat bergantung kepada tahap kefahaman mereka terhadap agama yang baru dianut. Semakin mendalam penghayatan mereka kepada agama tersebut, maka semakin jauhlah amalan-amalan agama lama itu mereka tinggalkan (Hasan Mat Nor, 2001).

Di Ulu Tomani, isu yang telah mengetuk pintu hati mereka untuk memikirkan semula tentang kepercayaan mereka ialah apabila mereka mendapat cerita tentang dua orang ibu dan anak mereka yang menderita anemia berjaya sembuh dengan

memakan sayur. Hal ini luar biasa bagi mereka kerana mengikut kepercayaan tradisional, memakan sayuran merupakan satu pantang bagi ibu yang baru bersalin. Mereka mula merasakan bahawa kuasa ghaib yang mereka yakini sebelum ini tidak mempunyai kuasa sebagaimana yang mereka fikirkan.

Berdasarkan pengalaman di Ulu Tomani, isu perubatan adalah pencetus yang telah membuka pemikiran masyarakat ini untuk melihat sesuatu perkara dari sudut yang lebih rasional. Mereka mula terfikir bahawa penyakit yang menimpa mereka bukan disebabkan oleh dunia ghaib sebagaimana yang mereka percaya sebelum ini. Lama-kelamaan mereka mula membuka ruang yang lebih luas kepada akal mereka untuk berfikir tentang rasional berlakunya sesuatu perkara.

Apabila masyarakat Murut Tahol mula menerima penjelasan logik tentang masalah kesihatan yang mereka alami, maka dengan sendirinya kepercayaan bahawa dunia ghaib sebagai kuasa yang menyebabkan sesuatu penyakit mula terhakis sedikit demi sedikit. Dalam masa yang sama, keyakinan mereka terhadap mualigh Kristian juga semakin meningkat; keadaan ini telah memberi ruang yang lebih besar kepada mualigh Kristian dalam menyampaikan ajaran Kristian. Di sinilah bermulanya pengaruh Kristian kepada masyarakat Murut Tahol yang kemudiannya diterima bagi menggantikan kepercayaan tradisional.

Berdasarkan pemerhatian yang dilakukan di Ulu Tomani, proses kehakisan kepercayaan masyarakat Murut Tahol kepada kinaruroa (semangat) dapat dilihat menerusi perubahan pada tingkah laku mereka. Sebagai contoh, jika dahulu mereka sentiasa mengelakkan diri mereka daripada melalui kawasan yang dipercayai menjadi tempat tinggal kinaruroa (semangat), seperti di batu-batu besar dan pokok-pokok besar kerana bimbang keselamatan mereka terancam; tetapi kini perkara seperti ini sudah semakin berkurangan.

Semasa membuat kajian di batu butuh di Ulu Sungai Padas, tanpa rasa takut seorang informan telah bersandar pada batu tersebut. Sedangkan mengikut kepercayaan tradisional mereka, batu tersebut adalah tempat tinggal kinaruroa. Sesiapa yang mengganggu batu ini seperti menyentuh atau menyandar padanya boleh dihinggapi berbagai-bagai penyakit ganjil seperti kebas kaki dan tidak mampu menggerakkan kaki secara tiba-tiba, menjadi bisu dan hilang ingatan, atau sekurang-kurangnya akan berlaku hujan lebat dan ribut petir yang kuat. Justeru, mereka sangat berhati-hati setiap kali menghampiri kawasan tersebut. Pengalaman ke batu butuh pada 2005 yang lalu bersama tiga orang pemuda Murut Tahol yang beragama Kristian menunjukkan bahawa, rasa takut mereka kepada kinaruroa (semangat) yang dikatakan menjadi penunggu batu butuh seperti sebelumnya telah terhakis. Menurut Andreas, "Tempat ini memang 'keras', tapi Jesus Kristus lebih berkuasa, Dia akan melindungi kita daripada kinaruroa yang tinggal di batu ini".

Proses penerimaan masyarakat Murut Tahol terhadap kehadiran Kristian menjadi lebih sempurna dengan kehadiran golongan muda yang komited dan menjadi tulang belakang kepada institusi gereja. Pemuda seperti Impau dan Lutus di Maligan, Amat di Ulu Tomani telah melaksanakan tugas dengan begitu baik sekali. Pastinya mereka itu mempunyai keistimewaan tertentu, bukan mudah untuk golongan muda memenangi hati masyarakat yang telah sekian lama berpegang kepada kepercayaan tradisional.

Golongan Muda Dalam Masyarakat Murut Tahol

Bagi masyarakat Murut Tahol, golongan muda merupakan golongan yang sempunya kekuatan tersendiri dalam komuniti Murut Tahol. Bukan suatu yang janggal atau mengaibkan sekiranya golongan muda lebih terkehadapan dan menonjol dalam masyarakat. Hal ini boleh kita kesan dalam mitos yang diwarisi turun temurun daripada nenek moyang.

Mitos tentang asal-usul padi misalannya, menonjolkan peranan golongan muda. Mitos Murut Tahol menyebutkan bahawa padi berasal daripada manusia iaitu seorang gadis yang mengorbankan dirinya untuk menyelesaikan masalah kekurangan makanan yang dihadapi oleh manusia.

Menurut Antikoh Lituan, pada satu masa dahulu bumi ini telah mengalami musim kemarau panjang dan mengakibatkan segala jenis tanaman mati. Hal ini menyebabkan manusia mengalami masalah kekurangan makanan yang serius. Sehinggalah pada satu malam, seorang gadis yatim piatu telah bermimpi bahawa kemarau yang sedang melanda bumi akan berakhir serta bertukar kepada cuaca yang baik dan sesuai untuk tanaman dengan cara menumpahkan darahnya ke bumi. Pada keesokan harinya, gadis tersebut telah menceritakan kepada abangnya Alomor berkenaan mimpi yang dialaminya. Beliau juga menyatakan kesediaannya untuk berkorban demi kesejahteraan dan kemakmuran manusia sejagat. Pada mulanya, abangnya enggan mempercayai kata-kata adiknya itu, namun demikian selepas didesak berulang kali, akhirnya dia bersetuju untuk melaksanakan perkara yang di mimpikan oleh adiknya itu. Dengan perasaan sedih dan berat hati Alomor telah membawa adiknya ke hujung ladang mereka untuk dibunuh dengan menggunakan sebilah pisau kecil. Alomor telah menikam adiknya di bahagian bawah ketiak sebelah kiri dengan kuat. Darah yang memancut keluar daripada luka tersebut terus membasahi bumi. Walaupun adiknya telah merelakan dirinya dijadikan korban demi kebaikan manusia sejagat, namun Alomor tidak dapat menahan kesedihan atas kematian satu-satunya ahli keluarganya yang masih tinggal.

Pada satu malam, Alomor bermimpi bahawa selepas tujuh hari darah adiknya ditumpahkan, ladang mereka akan menumbuhkan tanaman. Dalam mimpi tersebut dia diingatkan bahawa terdapat sebiji timun yang besar akan tumbuh di tengah-tengah ladang mereka. Timun itu tidak boleh dipetik sehinggalah ia benar-benar masak. Hal ini kerana menurut mimpi itu, adik perempuannya akan hidup kembali jika timun itu dibiarkan sehingga masak.

Tujuh hari kemudian, Alomor telah pergi ke ladangnya dan mendapati ia dipenuhi dengan padi. Dia juga mendapat terdapat pokok timun yang tumbuh di tengah-tengah ladang tersebut. Buahnya hanya sebiji sahaja, tetapi besar dan segar. Pada satu hari ladangnya telah diceroboh oleh seorang lelaki bernama Apaling. Dia amat tertarik dengan sebiji timun yang sedang masak lalu memetiknya. Sampai di rumahnya, dia pun membelah timun itu, ia amat terkejut kerana timun yang dibelahnya mengeluarkan darah yang banyak. Lantas ia pun pergi menemui tuan punya ladang dan memberitahunya hal yang berlaku. Lelaki muda itu pun menceritakan peristiwa yang sebenar dengan perasaan yang amat sedih kepada Apaling. Namun, semuanya sudah terlambat kerana adik perempuannya tidak dapat diselamatkan lagi.

Mitos ini telah memberi kesan yang mendalam kepada masyarakat Murut Tahol dan membuatkan mereka begitu menghormati padi yang dipercayai sebagai satu anugerah daripada sebuah pengorbanan. Daripada mitos ini juga, mereka menyandarkan kepercayaan mereka bahawa Aru' Kauli (semangat padi) adalah berasal dari darah gadis tersebut yang telah mengorbankan jiwa dan raganya.

Mitos yang kedua pula menyebutkan bahawa Alomor iaitu abang kepada si gadis yatim piatu tidak mempunyai benih tanaman walaupun dia telah selesai menebas dan membersihkan ladangnya. Setelah berfikir untuk beberapa ketika, dia masih lagi tidak dapat mencari jalan untuk menyelesaikan masalah itu. Akhirnya Alomor mengambil keputusan untuk pulang sahaja ke rumahnya. Oleh sebab terlalu letih setelah sehari suntuk bekerja di ladang, dia terus tertidur sebaik sahaja sampai ke rumahnya. Ketika tidur, Alomor telah bermimpi bahawa dia berjumpa dengan seorang tua yang tidak dikenalinya. Orang tua itu menyuruhnya membunuh adiknya agar dia dapat memperolehi biji benih tanaman dan meneruskan kehidupan mereka. Selepas terjaga dari tidurnya, dia berfikir sebentar tentang arahan orang tua tadi. Hati kecilnya mengatakan bahawa dia tidak sanggup untuk mengorbankan adiknya sendiri. Namun demikian, setelah memikirkan tentang manfaatnya kepada kehidupan di dunia ini, Alomor mengambil keputusan untuk mengikut sahaja arahan orang tua itu.

Dengan perasaan yang berat dan sedih, Alomor membawa adiknya pergi ke ladang mereka. Apabila mereka sampai di sana, Alomor meminta kebenaran untuk mencari kutu di kepala adiknya. Setelah dia merasakan adiknya sedang leka, dengan berat hati dia pun menikam adiknya dengan sebilah pisau pada bahagian kiri ketiak adiknya. Akibatnya adiknya terguling dan darah adiknya terpercik ke seluruh ladang. Selepas itu, Alomor pulang ke rumah dengan perasaan yang amat sedih atas kematian adiknya. Sampai sahaja ke rumah, dia terus tertidur dan dia bermimpi lagi bertemu dengan orang tua yang mengarahkannya membunuh adiknya. Orang tua itu memberitahunya bahawa ladangnya akan mengeluarkan berbagai jenis tanaman yang dapat menampung keperluan makanan manusia. Di bahagian tengah ladangnya pula ditumbuhinya sebiji buah timun yang besar. Orang tua itu mengarahkan Alomor memasang pagar dan tidak membenarkan sesiapa pun mengganggu dan memetik buah timun itu. Pada keesokan harinya, Alomor pun pergilah ke ladangnya. Alangkah

terkejutnya dia apabila mendapati bahawa banyak tanaman yang tumbuh di ladangnya seperti padi, jagung, ubi kayu dan timun. Mengikut kepercayaan orang Murut Tahol, kesemua tanaman itu berasal daripada adik Alomor. Padi berasal daripada darahnya, jagung berasal daripada gigi dan rambutnya, ubi kayu berasal daripada tulangnya dan timun berasal daripada betisnya.

Tidak berapa lama kemudian, berita tentang pelbagai tanaman yang tumbuh di ladang Alomor tersebar ke seluruh kawasan sekitarnya. Ramailah kawan-kawannya yang datang meminta untuk mengambil hasil tanaman di ladang tersebut. Alomor membenarkan dengan syarat mereka tidak mengganggu buah timun yang telah di pagar. Namun demikian setelah hasil tanaman yang terdapat di sana semuanya telah habis, maka rakan-rakannya mengambil keputusan untuk memetik timun besar di kawasan berpagar di tengah ladang itu tanpa kebenaran Alomor. Sebaik sahaja mereka membela timun tersebut, maka bercucuranlah darah yang mengalir daripadanya. Alomor sedih dengan peristiwa yang berlaku kerana adiknya tidak dapat diselamatkan lagi.

Ketika Alomor sedang asyik memikirkan nasib malang yang menimpa dirinya, tiba-tiba dia tertidur dan bermimpi lagi. Kali ini orang tua itu telah mengarahkannya “menebang” Batu Punggul yang terletak di Pensiangan kerana menurut orang tua itu adiknya berada di atas batu tersebut. Dengan menggunakan “titiuk” ataupun tulang landak, Alomor pun memotong Batu Punggul itu sedikit demi sedikit agar batu itu tidak jatuh terhempas dan adiknya dapat diselamatkan. Tidak lama selepas itu, datanglah rakan-rakan yang diketuai oleh Mamuaha untuk membantunya. Mereka telah menetak Batu Punggul itu dengan kuat sekali sehingga ia rebah lalu terhempas ke bumi. Akibatnya, adik Alomor tidak dapat diselamatkan kerana batu itu jatuh dan berkecaci. Impian Alomor untuk berjumpa dengan adiknya tidak kesampaian. Alomor berasa marah kepada rakan-rakannya namun semuanya sudah terlambat dan dia tidak akan berjumpa dengan adiknya untuk selama-lamanya.

Mitos ini secara tidak langsung telah menonjolkan peranan golongan muda dalam memberi penghidupan kepada manusia sejagat. Padi, jagung, ubi kayu dan timun yang mereka makan adalah hasil pengorbanan golongan muda yang berhati mulia dan tidak mementingkan diri sendiri.

PENUTUP

Golongan muda merupakan aset yang berharga kepada masyarakat Murut Tahol. Dinamika yang dimiliki oleh golongan ini banyak mempengaruhi perjalanan sejarah masyarakatnya. Perubahan agama adalah salah satu daripada sejarah Murut Tahol yang penting untuk ditonjolkan. Ini kerana, perubahan ini sangat signifikan kepada sistem kepercayaan masyarakatnya. Penglibatan golongan mudanya juga baik untuk diteliti kerana ia dapat dijadikan sumber inspirasi golongan muda hari ini.

Keupayaan mereka dalam menunjangi perubahan telah diterima oleh semua lapisan masyarakatnya. Selain daripada kekuatan tersendiri yang dimiliki golongan ini, hal ini juga disumbangkan oleh tradisi masyarakat Murut Tahol yang memandang tinggi keupayaan golongan muda. Kisah Alomor dan adiknya menunjukkan bahawa golongan muda Murut Tahol tidak pentingkan diri sendiri serta sanggup berkorban untuk kebahagiaan manusia sejagat.

RUJUKAN

- _____ 2010. Buletin Perangkaan Bulanan Sabah.
- Lees, W. dan Shirley Lees. 1987. Is it Sacrifice? Experiencing Mission and Revival in Borneo. Leicester: Inter-Varsity Press.
- Lees, Shirley. 2006. Drunk Before Dawn. Kuala Lumpur: Sama Publications & Distributors Sdn Bhd.
- Harris, Annette Suzanne. 1995. The Impact of Christianity on Power Relationships and Social Exchanges: A Case Study of Change Among the Tagal Murut. Sabah. Malaysia. Doctoral dissertation. School of Intercultural Studies. Biola University. Michigan: UMI Dissertation Service.
- Hasan Mat Nor. 2001. Salib dalam Komuniti Pinggiran. Kota Kinabalu: Universiti Malaysia Sabah.
- Rutter, Owen. 1929. The Pagans of North Borneo. London: Hutchinson & Co.
- Spitzack, John. A (ed.). 1984. The Murutic Language Family. Languages of Sabah: A Survey Report. Australia: The Australian National University.

Informan

Antikoh Lituan, 63 tahun, Kg Masanoi, Tenom.

Andreas Antahai, 28 tahun, Kg Alutok, Ulu Tomani.

Matiri b. Rana, 58 tahun, Kg. Alutok, Ulu Tomani, Tenom.

Pastor Yusof, 45 tahun, Kg Alutok, Ulu Tomani, Tenom.

Profil Penulis:

Abdul Hakim Mohad, PhD

Pensyarah Kanan

Pusat Penataran Ilmu

Universiti Malaysia Sabah

abd hakimmy@yahoo.co.uk

Ahmad Tarmizi Talib, PhD

Ketua Jabatan Pengajian Kenegaraan dan Ketamadunan

Fakulti Ekologi Manusia

Universiti Putra Malaysia

43400 Serdang Selangor.

tarmizi@upm.edu.my

Fatahyah Yahya, PhD

Pensyarah Kanan

Jabatan Kaunseling

Fakulti Sains Kognitif dan Pembangunan Manusia dan

Universiti Malaysia Sarawak

yfatahyah@fcs.unimas.my